



風角書

14
604
12





僧  
號 604  
卷 12



風角書卷五

濟陽張爾岐蒿菴著

開州李若琳洪箕甫校訂  
安康張鵬翥補山氏重刊

干支占法

四時五子占

春甲子風主頒赦 夏丙子風旱災兵荒 秋

庚子風刑濫兵起 冬壬子風水災國憂

四季戊子風歲收君吉頒赦

巫咸干支占



諸甲日大風丙丁必雨不雨則海中兵起 乙  
日大風米貴夷狄兵起 丙日大風有猝兵  
來圍急一日來圍邊城 丁日大風天傷物  
人畜疾疫爲旱 戊己日大風土功興米貴  
或遷邑 庚辛日大風蟲生人病急備邊陲  
壬癸日大風北夷侵邊  
子日大風日光沈沈兵起水中 丑日大風掃  
地揚沙粟暴貴 寅日大風赤黃氣四塞火  
災 卯日大風黃塵衝天蝗蟲大起 辰日

大風民入堡集居大將軍出行 巳日大風  
蓬勃大旱 午日大風乍疾乍遲人民流散  
邊防事急 未日大風日無光影土功大興  
申日大風聲如磬穀貴盜起 酉日大風  
蕭蕭濡潤大雨水災 戌日大風塵霧橫天  
揚埃千里北兵四起 亥日大風揚沙折土  
兵賊相攻人民哭泣  
不論五音六情但風怒號蓬勃天日昏慘卽  
占仍以久近爲災之大小三日內有雨卽



解

十二支占

凡太歲所在之辰月日時俱會於此風又從此方上來暴急寒慘者皆為客勝主不勝 如太歲在寅正月寅日寅時風自寅來餘倣此

二刑相會占

假令丑日時加戌風從未上來大寒尅者大戰流血主客俱傷所以然者丑刑戌風從未上來又刑丑而戌又刑未此三刑俱會也法主

大戰流血○申日時加寅風從巳上來同占  
子日時加卯風從子上來客大勝風從卯上來  
主人大勝

辰午酉亥自刑之日風從其上來客勝若時加  
辰午酉亥風從其上來主人勝○風從日刑  
上來猝暴者賊必夜來攻人

風從刑上來相衝擊者半路有賊突至逆行我  
者伏兵猝起軍中

凡風從三刑上來坐者急起行者急走賊必至



戰必敗宜誓眾固守庶保無虞月刑不出月  
日刑不出日

凡風從刑上來不惟兵戰百事大凶刑上發疾  
刑下發遲○假令子日刑在卯風從子來刑  
卯為刑下風從卯來刑子為刑上從刑上來  
利客從下來利主餘同此

凡刑金刑為兵金日庚申辛酉是也木刑為喪  
木日甲寅乙卯是也火刑為火火日丙午丁  
巳是也水刑為水水日壬子癸亥是也土刑

為土土日戊辰己丑是也

凡軍刑按刑當作行或  
是衍一行字逢歲月日時刑下風來  
者必有將死若得主相客死囚廢主人死

凡從歲刑按歲刑下  
脫上字來必有大兵人馬死不出

歲天下兵起 從月刑上來郡邑賊起 從  
日刑上來即日近境兵起一曰馬賊夜至主  
人兵敗 從時刑上來不出三日鄉兵起

刑德衝墓雜占

凡風頻從歲月德合上來日色明盛天氣清和



謂之祥風其占爲天子親賢遠奸偃兵物阜  
若風聲聒耳不調頻從衝刑上來謂之妖風  
其占爲用小人遠君子水旱不時天下凶  
凡風從刑衝上來不動枝葉者無傷怒聲寒慘  
乃有災如在軍將死

凡年月日時風從殺墓上來白濁寒昏皆爲凶  
兆其日三刑最急坐不及起有賊暴至若行  
軍卽防伏兵平時無兵防人謀害  
敵城相近攻之未克風從克上來射我軍經日

不絕止而復起者數日賊有伏兵欲來襲我  
或賊救兵至宜整備待之

凡風自衝來爲殃爲喪爲火兵兵爲大臣死以  
日占何國一曰自刑衝來蝗生粟米大臣災  
凡春甲夏丙秋庚冬壬四季戊爲天子風若順  
時從歲月日時德上來止於德合時方其風  
清和明朗者天子有德天下治平

凡八節之日風從三合六合及天門上來皆爲  
吉



子日風從午來午日風從子來甲日風從庚來

壬日風從丙來皆為衝甲乙日風從庚辛申

酉壬癸日風從辰戌丑未來皆為刑克餘

倣此其風暴怒慘濁皆為大憂在歲民

凡戊己日屬中宮無衝刑寄於乾坤艮巽艮巽

在辰戌丑未之時又止於辰戌丑未之方天

子有德歲美人安

戊分寄於奎璧己分寄於角軫天門地會之位也

歲月日時方德刑殺墓例附

干德

甲丙戊庚壬為陽陽德自處

甲德在甲 丙德在丙 戊德在戊 庚德在

庚壬德在壬

乙丁己辛亥為陰陰德在陽

乙德在庚 丁德在壬 己德在甲 辛德在

丙 癸德在戊

假令太歲在甲則歲德在甲太歲在乙則歲德

在庚餘倣此

日時同歲取月月取日日取時及方時取方歲



月亦兼取方

支德

歲月日時在子德在巳 在丑德在午 在寅

德在未 在卯德在甲 在辰德在酉 在

巳德在戌 在午德在亥 在未德在子

在申德在丑 在酉德在寅 在戌德在卯

在亥德在辰 以次序順行  
前五星是也

月干德

寅午戌月德在丙 亥卯未月德在甲

申子辰月德在壬 巳酉丑月德在庚

三合

申子辰合 亥卯未合 寅午戌合 巳酉丑

合

六合

寅卯 子丑 卯戌 辰酉 巳申 午未

干德合

甲己合 乙庚合 丙辛合 丁壬合 戊癸

合



歲月日時煞

寅午戌在丑 巳酉丑在申 申子辰在未

亥卯未在戌

呻吟煞

四孟月在酉 四仲月在巳 四季月在丑又

有四煞者劫煞災煞歲煞戊己煞是也

申子辰年月日時 劫煞在巳 災劫在午

歲劫在未

巳酉丑年月日時 劫煞在寅 災煞在卯

歲煞在辰

寅午戌年月日時 劫煞在亥 災煞在子

歲煞在丑

亥卯未年月日時 劫煞在申 災煞在酉

歲煞在戌

戊己煞者流戊就己坎離成象變動不居所謂

都天煞也甲己之年在辰巳 乙庚之年在

寅卯 丙辛之年在乙亥 丁壬之年在申

酉 戊癸之年在午未 其法每年但尋月



建天干值戊己者是也

歲月日時刑

子刑卯卯為刑下子為刑上 丑刑戌戌為刑  
 下未為刑上 寅刑巳巳為刑下申為刑上  
 卯刑子子為刑下卯為刑上 辰刑辰  
 巳刑申申為刑下寅為刑上 午刑午 未  
 刑丑丑為刑下戌為刑上 申刑寅寅為刑  
 下巳為刑上 酉刑酉 戌刑未未為刑下  
 丑為刑上 亥刑亥 凡刑下來者禍淺刑

上來者災深自刑者兼刑上刑下其災尤深  
 謂之三刑者刑上刑下自刑也

五墓

亥卯未木墓在未 寅午戌火墓在戌 申子  
 辰水墓在辰 巳酉丑金墓在丑 土墓在  
 辰

干刑

甲刑戊 乙刑己 丙刑庚 丁刑辛 戊刑  
 壬 己刑癸 庚刑甲 辛刑乙 壬刑丙



癸刑丁

衝破

子午相衝 丑未相衝 寅申相衝 卯酉相

衝 辰戌相衝 巳亥相衝

以上占國法附

凡歲月日時所主 甲為齊 乙為夷 丙為

楚 丁為江淮為蠻 戊為中國 己為韓

魏 庚為秦 辛為華山以西西夷之地

壬為燕趙 癸為恆山以北北夷之地 子

為周 丑為翟主遼東 寅為趙楚 卯為

鄭 辰為晉 巳為衛 午為秦 未為中

山梁宋 申為齊 酉為魯 戌為趙 亥

為燕代 假令丙辰年七月丁卯午時見災

於未地太歲在丙為楚辰為晉七月申為齊

卯又為鄭午為秦未為中山梁宋是其地名

有災也

干支附餘占

凡春甲乙寅卯日夏丙丁巳午日秋庚辛申酉



日冬壬癸亥子日有風鳴條帶雨不驟民安物阜

凡春庚辛申酉日夏壬癸亥子日秋丙丁巳午日冬戊己辰戌丑未日風起擺樹鳴或夾雨雪揚塵沙叫怒有聲皆為人不安物不成

凡春甲寅夏甲午秋甲申冬甲子天門乾上有風鳴條動葉有赦五穀大熟

凡春甲乙日風來來丙丁日風乾來庚辛日風艮來壬癸日風巽來戊己日坤艮來動葉鳴

條去地尺餘不揚塵沙風氣清和日光明潔民安國昌五穀熟蕃必有脫誤處此下二則入兵

占後

凡春甲子夏丙子秋庚子冬壬子四季月戊子謂之天子日春甲子日風雨有赦夏丙子日風雨兵起刑殺秋庚子日風雨有威賞之令冬壬子日風雨當進賢人四季戊子日風雨歲收國安有赦令

凡風勢緊急不及一二刻漸微而止遠不過十



里其占在民若在日辰刑衝方則外界有逆  
 祥異至在合方則外界有書信至 又曰若  
 在日辰刑傷方月內米貴若風急陰黑飛沙  
 揚塵不出兩月民不安若在日辰德合方月  
 內米賤在日辰本位上來民間有火此占不  
 但風至  
 則為災  
 凡風驟起吹沙走石經一日以來其占在大臣  
 長吏專視月建若在刑衝方來其地長吏有  
 憂病出司若風帶熱吹灰漲天天色陰慘為

大臣長吏死若在月德合及月建本位上來  
 一百日內長吏有賞賜遷官之慶  
 凡大風拔木飛石經一二日其占在君當視太  
 歲干支若自刑衝上來君怒欲行誅伐不出  
 三日米貴有旱澇之災自德合及太歲方來  
 不出三日有德令  
 右三占俱不用分野其詳具事類占中







立秋日七月甲寅八月己卯九月丙辰有暴風

從東方來七日夜不止兵起東方己卯疑是乙卯

立冬日十月丁巳十一月戊午十二月己未有

暴風從南方來七日夜不止兵起南方

以上皆不出衝大起

諸商日時在奸邪風從貪狼或陰賊上來日色

白濁若昏霧比連三日若七日人間盜賊屯

聚攻城邑不出一月遠不過七十日

諸商日夜半風卒起大霧至日中不解兵起

四季受傷之日怒風從四季上來時加子午  
外界民為賊屯聚相攻關梁塞道路絕不出  
七十日

諸商角之日怒風從奸邪陰賊貪狼上來白濁  
冥晦比連三日以上必有大兵起以日占何  
方近三十五日遠七十日

凡貪狼奸邪之日怒風蓬勃從陰賊貪狼上來  
寒慘昏濁又與歲月日刑相會或墓殺相會  
必有急兵至無兵為猝起



風角書  
諸風蓬勃四起或自下上來觸地名爲逆風有  
暴兵起平旦發人民逆食時發賓客逆日中  
發姻親逆晡時發臣下逆黃昏發賊隸逆半  
夜發同姓逆雞鳴發后妃逆皆大故不出三  
十日若風止有大雨則災不成 諸宮日時  
加子午風從四季上來有奸人揚言行間人  
君左右有親客內亂若風勢勃亂叫怒寒慘  
吹沙漲天日色暝晦或兼刑殺必有叛臣逆  
兵起

諸公正之日風從公正上來止於寬大爲長吏

勝賊

陰賊之日風從陰賊上來時加公正風止奸邪  
或從奸邪上來止於陰賊皆爲賊勝長吏

出軍占風

凡初出軍日時風從後來衝霧捲雲人喊馬嘶  
旌旂前指鼓角響亮者全勝又曰有鴉在後  
順風叫來大勝

凡兵大舉出城逆風來卽結營住守候風過後



起行更審彼方

假令三冬敵在乾而狂風從西北來則不可攻  
八方準此

凡初出軍及三日內行次風常逆來衝我旌旗  
不舉人氣怯馬不嘶或前或後或從旁起吹  
塵揚沙滄滄勃勃人馬行步無踪此名鬼風  
兵出必有挫敗當且止以觀便宜

連日昏霧沈沈風聲錯亂密雲不雨皆防下人  
有謀

凡出軍三日內道逢急風甚雨沾濕人馬不能  
行者不利

若其日風雲不興草木不動賊不可得一曰有  
風而草木不動賊不可得兵行之次風卒來  
突迫人馬辟易前有神廟祭之則吉

初出軍風或旋風傍起至軍前飄轉引道得天  
之助得敵資糧敵人來降

出軍而風逆來雨不沾衣名曰天泣軍必敗  
出軍之日暴風折旗大雨不止此天怒也必別



擇日進兵

若交戰而風從前驟來逆衝謂之落戶當其衝者大敗

出軍有飄風驟來牙旗摧折旗旛繞竿或直而下垂者交戰凶一曰將死○軍行而旗指後者不利一曰若大風揚旗東西南北週旋四轉將死軍覆○軍行回風相觸者中道必還戰亦無功

凡軍行有八難風生必須迴避敵來接戰必敗

八難風者遍歷八方回轉不定拔木摧屋吹塵蔽天望在敵上急攻之勝在我軍嚴備勿戰行道逢之宜結營寨令弱兵退守輜重奇兵強弩分據要害猛將銳卒陳於軍前防其衝突擊其惰歸兩軍相守占同  
風從五音相生上來生我爲母翊子如巳亥角  
風從卯酉羽來之類我生爲子扶母如巳亥  
角風從丑未徵上來之類天色清明風氣條暢者必勝



凡出軍之日風貴相生忌相尅貴清明和暢忌昏濁寒慘以日納音占客時辰風方占主德刑分勝負

凡八卦之日風從八卦而來吉行軍決勝武備志中又有十干占行軍二則自相矛盾徒亂人意故不錄

兩軍相守風占

凡兩軍相當先分八卦以察主客勝負若風從西北乾上來或正北坎上東北艮上來皆爲

利客宜先舉 若從正東震上東南巽上正南離上來皆爲利主宜後舉 若從西南坤上起有謀不成主客俱不利 若從正西兌上來客有伏兵主人宜設備不則敗 風從乾上來客舉兵必獲糧一曰風從離坎起挾刑殺者慎勿出戰 凡興兵之時風雲相交爲雨用兵之時龍虎相交爲戰大交大戰風爲主雲爲客風勝雲主勝雲勝風客勝



兩軍相當未知勝負以先舉人他人地者爲客  
後舉自居其地者爲主以日納音占客時及  
風起之方占主若有大風起以五行刑尅決  
之相刑則戰比和不戰若時方俱尅納音宜  
堅陣固守待彼先動以應爲主若時方俱爲  
納音所客宜先急擊之以應爲客又曰臨陣  
風從後來大勝

凡入敵境三日內有風雨雷霆從我軍上發入  
彼軍爲龍虎助戰大勝軍入敵境未遇戰忽

有急風來射我軍有雲乍西乍東迅速奔走  
者急防兵來又曰風急纔住而敵人至者我  
軍敗

兩軍相當暴風忽起從三刑五墓上來昏塵蔽  
天鮮葉茂條皆落乍起乍止者前後皆有伏  
兵掩人不備宜防之不可輕戰若天色晴明  
風不寒尅者不成旋風亦然更以五音日數  
占

兩軍相當有風從歲月日時上來勢大而遲



緩者備賊來有大戰若風勢急速乍起乍止者有狂賊小戰以日納音與風起時方占勝負

兩軍相守未戰忽有風從彼軍方來一曰破軍

此處疑有錯落字或陰賊方來初起蓬勃及至我軍

而低小蕭索其兵止十里外不戰若先遲緩

漸暴急者宜設備必有大戰

軍行屯營風動旂旛不動如無風然遇敵不戰而罷

商日大風折木從丑寅未申上起來比連三日

客軍大敗將死若主人力弱客亦自退

若從微風起在微日寬大時客軍急退不退其

軍不疾疫死敗即自潰散凡時方納音依

此

四季受角之日大風從四季上來時加子午客

兵入界自相殺不出三十日四季受商日同

陰賊之日風從陰賊上來大寒慘者賊自

相殺



商日怒風從陰賊上來賊自殺其主將

凡寬大之日時加丑戌風從寬大上來止寬大上者大兵解散

寬大之日時加己酉風從己酉方來止於己酉時方者羣賊解散

四季之日風從己酉上來賊兵解散

寬大之日風從己酉及丑戌上來夜起晝止者大眾欲解而主將不欲解若風晝起夜止氣色温和者上下同心解散若天色陰寒時日

雖善猶未解也武備志曰凡風夜動晝止賊必夜來攻指刑尅風非和解氣也寬大受商之日辛亥壬申是也

有風從己酉上來連三日至五日天色清明其散不出四十日遠七十日廉貞之日風從寬大上來天氣晴和者敵兵退散若四激上來敵兵自退四激者春戌夏丑秋辰冬未卽四季

凡遇解軍之風其風發時清明和暢卽不戰而



解若寒慘昏濁則戰若日辰受尅仍以戰散

四季受宮之日

春丙戌夏丙辰秋辛未冬辛未是也

風從寬大若

四季上來皆為敵軍來降

四季疑是辰戌丑未若秋冬二辛未

再考察

若四季受宮之日風從卯酉羽上來皆戰賊兵

解散尅所不勝故因戰而散

此條獨在武備志中于主客之

義未詳疑有誤

城營風占

凡坐營相守有急風從敵上來正射我軍上而

復下或止而復起必有大兵欲來攻襲宜早  
 備之若攻人城未下而有此風則有救兵自  
 外至若入地界已得城池猶有未下邑壘而  
 有此風必有兵來戰寒慘帶刑殺必須嚴備  
 凡與敵相守營寨上有旋風歷過者隨所歷有  
 寇至宜急備之又曰忽猛風揭瓦揚沙所來  
 之方必有精兵

旋風入營寨捲土伐屋倒戈徹幕急備不虞若

旋風自外入彼城營急宜從入處攻拔之



軍纔下營旗鼓方張而有暴風來捲軍幕傾敗  
干戈者大凶一曰主將失位軍人叛散似主  
敵兵至上占或謬又曰有奸謀

旋風吹物上空在城營中兵不利宜固守武備  
志曰我軍與人有謀宜撫將佐犒士卒旋風  
數日不止兵起屠城旋風千百為羣縱橫襲  
人主屠城

風飄書物入城勿取收宜祭土地又曰得土也  
風飄衣出營宅外有賊至平時有禍

以上二則  
出武備志

諸羽日怒風從商上起揚沙晝晦有兵來攻城  
邑若至日中半夜風益怒此時攻城不下客  
軍必敗商金羽水母子為強子午宮土制水  
勢不能行城可固守外必自敗

諸角日大風勃怒從申子亥卯上來大寒昏慘  
至夜半或日中其風益怒連三日以上有大  
兵起攻城城必陷主人宜出避之子午宮土  
日辰角木尅之不利為主故攻城則必陷近  
期九日中二十七日遠九十日



諸羽日大風日光冥冥昏霧沈沈大兵圍城客  
勝期五日中十日遠一月

商日怒風從子午上來時加子午日光冥晦不  
利主人宜防內兵自亂

凡奸邪受宮之日怒風從宮上來止於四季風  
氣寒慘城中兵亂夜殺長吏四出不禁近期  
七十日遠九十日

凡有兵圍城視諸商日有風從丑上來比連三  
日以上至七日客軍必敗退丑尙按尙當墓

也又爲陽徵商金遇之兵敗將死近期七日

中二十一日遠七十日

凡日中夜半風從申子亥卯上來夜發晝止日  
中大寒不解敵必夜來攻城劫營不避風雨  
主將忌之期五日若十日末句疑有脫誤

乾上有風吹倒旗旛此天怒不可攻城

艮上有風帶黃黑色作鐘鳴者此夜有賊劫營  
損兵

震上有風清涼無塵吹麾蓋簷捲者城內有賢



士不可攻

巽上有徵風吹林梢自響者名叫噪風城內有神靈助不可攻

以上四條出武備志

邊夷水賊風占

四季受商之日

戊辰癸未戊戌癸丑是也

時加子午怒風從

四季上來五日而止四季上者天子欲伐四

夷也所以然者四季主四夷角木尅土故知

欲伐四夷也欲知何所伐當視風所止止辰

為伐東夷止未為伐南夷止戌為伐西夷止

丑為伐北夷皆期九日至九十日若風止有

大雨則不成災

止一指

若天子意有所伐亦當

視風舉事

凡壬辰日主東夷風從辰上起七日至九日東

方海賊動期五十日乙未

一作癸未

日主南夷風

起未上比連七日南蠻反叛內侵期七十日

壬戌日主西夷風從戌上起七日以上西羌

反叛期五十日癸丑日主北夷風從丑上起



七日若九日匈奴大入還邑期二十四日八  
十日 以上風勃怒叫吼則占

凡壬辰壬戌壬子壬申之日有風從子上來三  
日以上昏慘暴急日色不明此水內大賊欲  
攻王國近期七日遠不出三十日風大寒慘  
侵入肌骨不解皆為賊發從王相來賊發疾  
囚死來賊發遲一曰風大寒則夜至

壬戌癸亥乙卯壬辰甲申丁未六日有風從申  
子亥卯或辰未上來水中賊起相殺以六日

皆受羽申子貪狼亥即陰賊辰未奸邪故也  
近期五日遠五十日一曰商日宮日烈風從  
四季上來時加子午兼帶刑殺或申子亥卯  
上來當有狄人犯順

諸羽日大風昏霧夜半從申子上來陰寒迅急  
當雨不雨水賊攻絕津梁道路不通近期五

日遠五十日

四季受宮之日

丙辰辛未丙戌辛丑是也

風從四季上來折

木揚沙五日以上至九日止子午上或時加



子午時此為夷狄君長萬里來朝或遣使貢  
獻近期五十日中百日遠百五十日天色溫  
和清明乃至寒慘昏濁不至

壬辰癸未

一作乙未

壬戌癸丑四季之日有風從申

子亥卯或辰未上來迅急寒慘比連三五七  
日此外界羣賊屯聚并勢侵犯郡國晝伏夜  
行猝起作逆不出七日十四日或七十日一  
日邊界長吏結連外夷內侵大凡此四日有  
風從貪狼陰賊奸邪上來勃怒陰慘即為夷

狄侵犯

庚辰乙未庚戌乙丑四季受商之日時加商風  
從亥卯辰未上未止于子午滿五日以上至  
九日風怒不解夷狄兵起若風中止或更轉  
己酉上來賊必自解近期七日中七十日遠  
百日若風雖急暴不滿日止或轉從子午上  
來或時加子午散氣沾濡若雨濕然皆為賊  
軍中道解散

四季受商之日怒風從四季上來外夷欲屯聚



風角書  
寇掠不出七十日若從四季上來不滿日復  
從四仲子午卯酉上來轉從陰賊方來或時  
加陰賊寒慘迅急日冥無光此夷狄兵起中  
道自相殘殺不至近九十日遠百二十日一作  
九日十日若風從四季上來十日不止千里  
二十日兵來二十日不止二千里兵來期七十日  
四季之日暴風卒起及遊風須臾止者為千里  
外兵來不則近界羌敵為變事不在千里而  
千里外之人亦可以應其占風小事大風大

事大若風滿九日則為萬里外兵若羌狄居  
畿甸者有變

凡大風從四季上來止于子午氣色清明天日  
和緩者四方邊界欲來求和隨日占之未說

大凡四季主關津道路主管鑰主遠方客主外  
郭外州外界夷狄以風起日數知遠近遲疾  
知進止寒溫生尅知勝負神而明之存乎其  
人

水火災風占



凡受羽之日風從卯酉羽上來天雲陰潤人心  
悲慘連三日者必有暴雨大水驟至若風來  
帶刑殺及起于貪狼奸邪陰賊日時則有水  
中賊起

凡風從卯酉來時加卯酉風勢肅肅條習又止  
卯酉潤氣濡物者大雨即至

諸角日有怒風從寅申辛未徵上來乍遲乍疾  
時加夜半火起宮寺院廟中

辰午酉亥四日爲自刑日其日受商而風從徵

來辰日加辰燒全部二千萬傳舍大臣將相  
之宅 午日加午燒都廷尉舍大夫官吏之  
宅 酉日加酉燒貴府太傅舍廚庫貴人店  
肆 亥日加亥燒喪家并居肆牢獄若囚徒  
之家大寒迅急則燒殺人溫和但燒屋不殺  
人風止即有雨下雷電乃已不然雖期內有  
雨火亦必起

四季受商之日怒風從四季上來止于午者下  
亭鄉市失火有文書三日至期內而不發



諸亥卯受角之日怒風從丑未上來時加申子  
賊以火攻主人寒急者殺人財出若時加廉  
貞公正此仇怨相殺不出三日六日以日占  
其地角屬木壬于亥卯丑未微火木因火發  
也申子貪狼故為盜賊公正廉貞怒惡之情  
故為仇怨

諸徵日時加徵暴風卒起而天氣清明者有檄  
書至為火災事近三日遠三十日以日占國

一日徵日怒風從徵方來時  
加子午乍疾乍徐雷火災發

凡陽徵日風從陽徵來時加徵夜半為都市中  
府寺火起○風從陰徵來為下亭鄉市人間  
火起

凡占火得己酉之時此誤相燒也得公正之時  
為仇怨相燒得廉貞之時為文書口舌相燒  
得貪狼之時為賊攻燒主人得陰賊之時為  
惡人遞相燒或捉賊燒屋得奸邪之時為小  
盜陰私相燒日辰王相有氣者人事相燒囚  
死無氣時加商角鬼神所燒也若徵日起風



或更加時徵方徵聲止者三日以上天氣赤黃七日不解天災火起千里相望近期三日遠三十日若風止卽有大雨則解暴風忽起東南巽方繞木悲鳴聲如搖火有火災不出三日  
丙寅丁卯之日怒風從寅卯上來爲都市中火起所以然者丙丁火寅卯木也木得火而然卯爲都市期三日或丙七丁六日應期內有雨卽止

乙巳略例辰戌之日及諸受商之日風從辰戌上來巳亥及諸受角之日風從巳亥上來及諸徵上來受徵之日風從辰戌上來辰戌及諸受角之日風從丑寅未申上來辰午酉亥之日風從辰午酉亥上來以上諸風鳴條擺樹乍起乍止勃怒暴亂天色昏冥皆爲發火之候風二三刻止火非遠半日止十里內一日止五十里二日止百里三日止千里又初疾後慢火非遠初慢後疾火遠旺相時方燒



風角書 卷六  
都市宮屋官舍第宅囚死時方燒廟宇牢獄  
休廢時方燒驛亭店舍鄉郭閒屋

候風知詔書

諸陽宮之日風從陽微上來為詔書到欲知何  
書以風至之時占之 時加寅午遷除詔  
時加巳酉寬大詔 時加丑戌徵召詔臺詔  
時加申子賦斂詔 時加亥卯接章事老  
詔一曰盜賊事詔 時加辰未嫁女傳詔皆  
期九日遠則四十五日

諸陽宮之日風從日月歲刑上來回止德方風

大迅急此上官被收下官證無罪

春甲夏丙秋庚冬壬天子所在風從其上來有

天子至若時加公正此天子令也時加奸邪

此詐書不可信

風從帝旺上來若子丑上來為詔書

此下一行不可讀必

有謬若從相來為公卿書

候喪疾風占

壬子壬辰之日風起夜半止夜半占皇后國夫



人起日中止日中占人君他倣此此條有謬誤

庚子陽宮之日日中夜半怒風從子上來止辰

此為宮動宮止辰為入墓一作中宮為人君

期九日遠九十日

庚午陰宮之日日中夜半怒風從子一作子上

來止午若辰后有喪疾解同上風起三日以上

乃以此占不滿三日為病

諸角日大風從亥來二日止未二千石有死喪

期九日遠二十七日

壬子角日風從未來三日止使者州刺史有喪

癸丑日風從未來一日止丑令長有喪

己亥之日有風從亥上來半日止未丞有喪

丙戌日風從未上來止戌小尉有喪

四季受有缺文疑之日風從未上來比連三日

民大疫 若風從己亥上來止未民大死喪

期二十七日

己亥受角之日風起己亥止己亥此長吏客喪

止亭傳近期三日一日亦為民殃



五音之日風從五墓上來若止墓上皆為死喪  
憂事如宮墓在辰宮日風從辰來或止辰是  
也若從旺相方來止旺相方則為人安主昌

五墓例附

亥卯未木

角

墓在未

寅午戌火

徵

墓在戌

申子辰水

羽

墓在戌

申子辰水

羽

墓在辰

己酉丑金

商

墓在丑

土

宮

墓在辰

凡五音之日風來色黑不睹人面先緊後慢經  
刻止者主疾病惟數為期如甲子日二九之

數近十八日遠八十日更遠則九年

救百姓疫法附

春以己角之日戶曹出行疫病至未方治壇用  
白羊白犬白雞禳之夏遣法曹秋遣金曹冬  
遣水曹四季遣功曹各于其時之墓治壇用  
雞犬羊用所被尅之色救之則雖疾不傷不  
遣則其災必大應沖月

候風知赦

春 甲寅帝 乙卯王 庚申為詔獄



辛酉爲司空

夏 丙午帝 丁未王 癸亥爲詔獄

壬子爲司空

四季 戊午帝 乙未王 甲寅爲詔獄

乙卯爲司空

秋 庚申帝 辛酉王 丁巳爲詔獄

丙午爲司空

冬 壬子帝 癸亥王 戊戌爲詔獄

戊辰爲司空 凡帝王之日風從詔獄上來

大赦司空來小赦

冬當以戊午爲獄疑有誤

春甲寅日時加申風從甲來三日止申其風溫

和法爲有大赦期六十日又云風從庚來有

大赦

乙卯日時加酉風從甲來止申爲小赦期四十

五日

夏丙午日時加亥風從丙上來止亥其風清和

有大赦期六十日又云風從壬上來有大赦

丁巳日時加午風從丙上來止亥爲小赦期四



十五日

四季月戊午日時加寅風從寅上來止于寅有

大赦時加卯小赦期六十日以不二十卯日

未上來小赦

秋庚申日時加寅當作巳風從庚上來三日止于

巳風溫和有大赦期六十日時加申子為小赦

冬壬子日時加巳當作戌風從壬上來其風調和

按此下當脫時加辰一日為小赦期六十日

之內 以上盡按帝王例改定未知是否

冬至後丙申日風從丙上來大赦○甲申戊申

庚申日風從丙上來小赦○丁巳之日風從

巳上來三日止大赦一日一夜止小赦 寬

大之日時加巳酉風從巳酉上來三日止詔

獄時大赦

常以帝王之日巳酉日獄日候風從王上來加

獄時若止獄時皆有大赦鳴條以上占之

諸戊巳壬日風從天門上來有赦

春甲日日出之時風從卯上來須臾止又復從



卯上來有赦近二十日

春甲子天子庚為獄有風從甲上來時加庚為有赦若連三日止庚其風清和必有大赦風止卯而雨有賞賜期九日遠三十日餘三時依此例推之

春甲日風從甲上來止庚須臾止有牘書半日

止府吏原罪一日一夜止州牧原罪三日止

使者原罪餘時準此例

春甲日旋風入人家從甲來止庚亦為有赦令

春風常從甲來止庚必有赦令亦為陰陽和律

呂正國有喜

四季寬大之日時加巳酉 從正王卿上來止

巳酉有赦 風從墓來若加時巳酉入止王

相或帶德及德合皆為死者得生囚必遇赦

候風知遷官免罪法

國君公卿以下所屬日

春三月寅皇后 甲天子 卯太子 乙太子

如 辰太子吏 巳司空 丙司徒 午太



尉	未九卿	丁太傅	申司隸	庚詔獄
酉庶民	辛卒徒	戌夷狄	亥宗廟	
壬內相	子宮府	丑大將軍	癸內藏	
夏三月丙天子	巳皇妃	午太子	丁太子	
妃	未太子吏	申司空	庚司徒	酉太
尉	辛太傅	戌九卿	亥司隸	壬詔獄
子庶民	癸卒徒	丑夷狄	寅宗廟	
甲內相	卯宮府	辰大將軍	乙內藏	
秋三月庚天子	申皇后	酉太子	辛太子	

妃	戌太子吏	亥司空	壬司徒	子太
尉	癸太傅	丑九卿	寅司隸	申詔獄
卯庶民	乙卒徒	辰夷狄	巳宗廟	
丙內相	午宮府	未大將軍	丁內藏	
冬三月壬天子	亥皇后	子太子	癸太子	
妃	丑太子吏	寅司空	申司徒	卯太
尉	乙太傅	辰九卿	巳司隸	丙詔獄
戊庶民	丁卒徒	未夷狄	申宗廟	
庚內相	酉宮府	戌大將軍	辛內藏	



春寅爲皇后此日中有暴怒勃亂之風從午上來五日以上皇后有大憂其氣溫皇后有乖近九日遠九十日有雨卽解

春丑爲大將軍此日有大風發屋折木從丑上來四日以上有氣將軍賀賜無氣有罪迅急寒尅有憂近八日遠八十日

春丁巳爲三公風從丑上來三公座上天色晴明三公遷封受賀將軍賀賜按將軍賀賜四字疑衍風氣寒急日不明三公退免受誅丑者巳日墓

也餘時皆倣此占

四時風從天子上來視所止爲詔書所加風氣清和爲遷官寒急昏濁爲憂罪風止而雨爲事解雨止復風爲事不解日少從近期日久從遠期卒暴從近期遲而怒從遠期

戊子戊午甲辰甲戌四日以四時候時者州牧刺史從事檄書風從其時上來有氣爲遷官無氣爲免退○假令春甲辰日風從辰上來三日止甲使者徵拜尙書若風從甲上來三



日止辰使者徵遷二千石近三日遠二十七  
日書到

諸使者用事之日風從徵上來止辰使者遷二  
千石○止丑使者上書止公卿座其風清和  
有遷賀吉若大寒迅急爲使者奏三公二千  
石令長當免退近三日遠三十日

丙辰日爲府君其日有風從辰上來二日止君  
位上二千石徵納補若有風從辰上來止午  
清和者二千石奏使者寒急者二千石奏刺

史更相奏上有氣勝無氣者凶 止辰爲奏  
事者不還得罪近九日遠四十五日

五丑爲令長相奏者此日有風從丑上來大寒  
急止辰上有氣此令長奏府君止午奏使者  
止公座則奏公座此下官與上官相奏以寒  
溫決勝負

五亥主諸丞凡亥日風從亥上來亥有氣丞遷  
賀無氣丞免官風半日止者郡丞二日止爲  
府丞三日止爲州治中四日止爲公侯長吏



五日止爲尙書丞丁亥爲二千石

五戌爲都尉丙戌之日有風從戌上來戌有氣

尉遷賀無氣免官年日須與爲小尉温和爲

遷賀寒爲免官他倣此

諸寬大廉貞公正之日有風從丑上來視所止

爲君德所加主有遷官賞賜以四時位言其

風若大寒迅急君有暴令視所止之位當之

此條舊在  
候客內占

候公侯貴客占法

諸陽宮寬大之日有大風從天子上來止三宮

座上爲三宮入賀期一日九日丙辰戊寅  
日是也

凡大風折木從臣座上來止君位皆爲臣書奏

事清爽温和不寒慘爲有喜從刑殺上來日

光昏慘者爲有奸 假令廉貞寬大公正之

日其日清明風從臣座上來止君位其臣忠

正所奏公直必有慶若奸邪陰賊之日風氣

寒冥者反是假令宮日時加宮此近臣也

須與止者四十里內半日止者五十里內一



日止者百里內二日止者千里客三日止者外臺使也四日止者外州使也五日止者邊將死也七日止者萬里夷狄使也言止者皆爲止于君位若風昏冥寒急此遠方使至必懷叛逆其風來日時得六情之正皆爲正臣欲有獻于君清溫者遇吉寒迅有憂風從宮上來寒急者君怒也溫和而雨爲欲加位賜

凡四季受宮日風從四季上來止君位若太子

位皆爲客候主人諸陽主長吏諸陰主民間

不解

如欲候天子所在如春三月天子在甲有風從

甲上來時加甲風止寅天子入後宮 甲來

止丑天子入將軍 止酉天子侯白衣士

止戌天子入都市誅止辛天子入人家 又

曰止四季天子出遊千里止四仲出遊百里

止四孟行出城郭與上占不合占諸侯令長同法

春天子在甲在內以占天子在外下邑 民



之吏至二千石諸侯亦占甲所謂君人者大小同占也

風從臣位止于君位皆為臣上事假令春有風從未上來止甲為九卿上事入省從丑上來止甲為大將軍上事入省他做此

何以知大將軍兵先起商角之風兵起風上宮羽徵風兵起風有誤

假令陽角之日風從甲起則為大將軍先將兵出也欲知勝負按法言之風相生則和相

尅則戰如角日風從羽來角羽相生大將軍出兵必勝他傲此

兵占附餘

凡軍興右畔有風動塵上者則士多死傷風雨驟從四維上來翻覆迴轉城營中必有反者風從四維上來乍高乍下寒迅者敵欲伐伐下疑有缺字山林伏兵暴風伐屋折木從四維上來名曰賊風有賊兵從風所來南北不出八日八十日東南不出四日四十日西南



不出二日二十日西北不出六日六十日  
凡大風黑雲綺錯臨軍者軍有憂十五六日者  
大憂十七八日者軍破敗敵者有此急伐之  
凡風聲怒鳴氣勢慘悽連日不止有兵則敗于  
所鳴之方無兵則其地主民者有憂喪亦爲  
有火災

凡春甲申丁酉日有大風從西來 夏戊申己  
酉日有大風從北來 秋壬戌己巳日有大  
風從南來 冬甲辰戊午日有大風從四維

來皆爲大賊方起者若已有賊必來相攻亦  
有謀叛者

凡春丙子夏戊己秋壬癸冬甲乙日有暴風急  
雨寒尅者賊兵起已有賊必入界若風至夜  
不止必有大賊圍城

右二則原在占國法中







旋風起宮宅中以六情言清和吉王相有氣亦  
吉凶死爲凶

旋風猝起宮宅之中或從外入揚人衣服發人  
屋宇皆爲有猝暴事

若從歲月日時德上起來或止于德方德合  
之方或寬大日辰直德合之時王相有氣則  
爲吉事 若從歲月日時刑衝墓殺上來或  
止刑衝墓殺方或日辰凶死勝時下及貪狼  
陰賊奸邪之日皆爲凶事 旋風起坐席君

子失官小人失財若從刑墓上來行者急走  
坐者急起避之

旋風從地中出直注卜師死 旋風入屋中飄  
揚衣物當憂財物驚火 以上槩論

宮日旋風起宮宅中爲國訟爲囚係爲縣官有  
連引事若起道路從內向外衝上吉商日風  
起宮宅中有人持酒肉來不出三日角日憂  
疾病徵日憂火羽日憂失財物以上五音日占凡宮  
宅之內西堂爲父東堂爲母堂邊爲長子房



爲婦女庭爲眾牆壁爲少子井竈爲婢僕門  
爲賓客回風猝起者從外人皆爲德刑言其  
所主之人之吉凶一曰南堂爲父北堂爲母  
東堂爲子西堂爲孫又曰宮宅中庭爲大眾  
庭戶爲四鄰垣牆爲小口井竈爲婦女確磴  
爲奴婢馬廐爲從隸客堂爲外人門爲賓客  
廳爲諸公客有風起止其地時加奸邪陰賊  
或從奸邪陰賊上來而止于奸邪陰賊之地  
各防其人有謀若風氣寒慘帶刑殺尅害而

來有所觸損者各言其人有災

凡回風暴風猝起宮宅諸商日時加寬大風從  
角上來止于囚死休廢爲賓客作奸風起門  
外入門而止于商時方亦然加奸邪不覺加  
公正覺

商日時加申風從未上來回入南門至堂邊爲  
長子作盜回入井爲婦女作奸欲共他人殺夫  
陰賊之日時加申子風從奸邪上來止陰賊婦  
女作奸欺夫



辛丑日時加午風從宅中從午上來後三日有酒食

商日辰時風從純商來為怪慘物害人

商日風起純角入宅為惡鬼入宅害人日辰旺

為縣官從王鄉來為家長相鄉來為子孫休

廢來為賓客囚死來為下賤貪狼來為盜賊

奸邪來為淫婦小人公正來為仇人餘以類

推之

凡在公宇廳院園苑之內有旋風分明依道不

急不惡清明和暢漸向前來當有賢人君子

至或為使命喜慶之事

以上日時加方占例

凡宮宅中同坐非止一人或十餘人同行而有

旋風相衝來未知誰當以風發之時方日辰

推之風從宮來即宮姓者當之若同音者非

一人即有以長幼別之孟為長年寅申巳亥

主之仲為中年子午卯酉主之季為少年辰

戌丑未主之若長幼同者又不一人則以休

生別之日辰壬相事在尊長貴人休廢囚死



則在卑幼賤役又陽日取男及在左者陰日  
 取女及在右者又同則取衣服之色宮黃徵  
 赤商白羽黑角青或取其所執持之物決之  
 卽知其事所在若飄風起而止前者以時音  
 期之後來逐人而過去者以日音期之此分  
 別事  
 之所  
 在

行道占

凡行道見旋風從正南來一日從  
 西方來有酒食若時  
 加巳酉皆大吉 旋風起吉方兩處夾道隨

人行者重吉久不滅亦無他但從凶地來卽  
 凶 行道有旋風從前面來逆衝人者勿前  
 防有伏匿相謀以時下及日德刑占之 旋  
 風急從後來逐人亦以其日干支納音時加  
 刑德五音六情占之又以清和爲吉寒濁爲  
 凶 旋風傍起前行或橫而過皆當以日辰  
 刑德占之以上概  
 論吉凶

凡行道有回風四面而覆人宜回避之 宮日  
 有田土爭訟 徵日有鬪訟 若從徵方來



家戒火 羽日失財物若憂酒肉事聚眾于  
 上 商日為失財亡遺人所謀 角日有疾  
 病從角地來有死喪事 宮日回風突入戒  
 田宅憂移徙或爭訟田宅若道上遇之不宜  
 為客衝外則吉 徵日戒告訟文事凶或有  
 失金錢事 羽日戒入水行舟防沒溺或失  
 財物有聚眾事 商日戒爭財物防鬪傷若  
 入山林墜下被傷 角日有疾病死喪事不  
 則相擊傷 以上以五  
 納音占之

旋風從人本命墓上來而值之為疾病時加角  
 為從高墜下若失足竹木所傷 時加徵為  
 燒灸若見血 時加宮為瘡腫 時加角 按  
 疑當  
 作商為金刃所傷 時加羽為沒溺壓死  
 旋風從本日來墓上值之者疾病  
 歲刑上來為縣官事月刑上來為尉郡鄉亭  
 事日刑上來戒爭訟事時刑上來有卒急公  
 事皆凶  
 旋風從歲月日時德上來皆為有喜慶酒食吉



事假令今年在木鄉有木器物從北方來在  
 火鄉銅瓦器物從東方來在土鄉田宅器物  
 從南方來在金鄉錢物從四季方來在水鄉  
 酒肉六畜從西方來以上概論歲德  
 四季之日四孟上來上官長吏有賜與四仲之  
 日四仲上來次官長吏賜與四季之日四季  
 上來下官長吏賜與 若商日又辰加商金  
 銀銅錫之物徵日又得徵時文書采色之物  
 羽日羽時若水物角日角時木實米粟繪帛

等物宮日宮時玉瓦器脯肉皮革之物以上論日  
時王相其物良囚死則敗濫審在德鄉後以  
 五音占之非泛指五音日也以上刑德占  
 暴風在眾人中亦可以五音察憂吉所在此當在宮  
宅占末款內  
 凡行道之次忽遇暴風旋風當以行年決之若  
 從寬大廉貞公正上來與本命相生則吉從  
 奸邪陰賊貪狼上來與本命相尅防侵害若  
 昏濁蓬勃又加刑殺大凶



本命行年例附

日家起小運不問陰陽二命男一歲丙寅二歲  
 丁卯順行截法十一歲丙子二十一歲丙戌  
 推至本年為行年 女一歲起壬申二歲辛  
 未逆行截法一歲壬申二歲辛未十一歲壬  
 戌二十一歲壬子推至本年為行年 本命  
 者即生年太歲支干辰也

國事占

旋風入宮闕中一日再三名曰太陽戒不出一

年內兵起

天鏡占風飄吹衣被于都市中有殺主不出一  
 年

軍行有大旋風起軍前來右回繞者將死左回

繞者得敵糧更以時方占之乃得

凡扶搖獨鹿之風卒起軍營中有反者

凡出軍守壘見旋風卒起與宮宅行道占同遇

德方吉情皆有吉事遇刑煞凶情軍必移營

戰必退守旋風起席間戰敗或來衝逐或當



面截過并用日辰干支五音六情占之如行道有旋風四面圍迫宜迴避宮防夜來劫營商防賊兵掩至角防林麓埋伏徵防火災羽防雨水暴溢又旋風起方時日與大將軍本命行年相生則吉與本命行年相尅防賊沖殺陰謀

出軍行營各自有占此特略言其例不具

載

天門風占附

天下多有出風之處名山大川皆有風穴惟天門所出風可占天門者乾方也戊乾亥同爲乾方

天門上發風擺落樹葉而天氣清明日色光輝者天子有德令行天下臣皆喜

天門上發風去地尺餘不動塵土拂拂然天色晴明黃赤雲遍天謂之祥風天子有赦令囚人出獄

天門風起先急後慢慢拂經時黃雲遍天忽來



微雨忠良在位民安樂

天門風起初慢後急吹沙走石折木發屋黑氣  
遍天經時而止謂之邪風佞臣在位天子憂  
病若風止而雨即解

天門上風出初微漸大排樹有聲如雷吼經時  
乃止天子欲行急令有赦年收半日止五穀  
成賢人至天下安一日止大赦不出一年一  
日半止天子發大使出安邊行德令撫問事  
二日止外國來朝貢有大喜二日半止天子

欲郊祀大赦天下三日止五穀大成遠夷加  
貢必風氣和暖清明乃作上占若風夾熱氣  
天下穀貴蟲傷一分冷氣民勞若風氣黑慘  
陰濁天子有病三年災民物不安  
一曰宮日宮時天門上風來皆為吉

飄風占附餘

有風忽起西北方旋復東南四轉五復者主將  
貪虐士卒謀逆

旋風猝起敵軍上急擊之勝若自敵上來入我



營中敵欲降挾刑殺而來者敵欲攻備之吉

此說小異必詳刑德定之

旋風猝起而帶三刑五墓賊有伏兵營中旋風

頻起而出者不可以戰移營去之

旋風挾時刑主人勝日刑客勝

旋風直上衝天起軍中急戰大勝亦與他說異

凡暴風入發屋不出六十日有相殺者若入宮

殿主者惡之入宮裂帳幃君有憂入軍折旗

鎗將有憂







夏秋之交大風及有海沙雲起謂之風潮名曰  
颶風此颶乃西方之風也有此風必有淫霖

大雨同作

凡風單日起單日止雙日起雙日止

凡風起早晚和須防明日再多

凡暴惡之風盡日而沒

夜起之風必毒

凡東風急起急雲起愈急必雨起最難得晴

凡春風易於傳報一日南風必還一日北風雖

早有此風向晚必靜防南風尾北風頭南風  
愈吹愈急北風吹起便大

春南夏北有風必雨

雲若砲車形起主大風

雲起下四野滿目如烟如霧名曰風花主風起

雲若魚鱗不雨也風顛

凡雨陣自西北起者必雲黑如澄墨又必起作

眉梁陣主先大風雨後雨急易晴

水際生靛青主有風雨



風角書  
秋天雲陰若無風則無雨

海燕忽成羣而來主風雨烏肚雨白肚雨

海豬亂起主大風

夜聽九道遙烏叫卜風雨一聲風二聲雨三聲

四聲斷風雨

鰕籠張得鯽魚主風水蛇蟠在蘆青上高若干

水高若干漲若干回頭望下水卽至望上稍慢

月盡無雨則來月初必有大風雨俗云二十五

六若無雨初三四日莫行船  
春有二十四番花信風梅花風打頭棟花風打

末

風忌

正月忌七八日風乃北風也

二月忌初二北風

三月忌清明北風

四月忌立夏風

五月忌雪至風乃以五月下雪日爲始算至五月

風角書

卷八

三



六月忌彭祖風

在前後三四日

七八月若有三日南風必有北風報之

九月九日忌九朝風

前後三四日

十月忌初五風

在前後三四日

十一月忌冬至風

十二月廿三四日忌掃塵風

海運抄略

日離海角晴明無暴風 日出赤霞有黑雲午

後大風 日色慘白風起漸大 日起日落有

脚必主風雨 日昏有雨日暴燠熱有風 日

色朦朧陰霧有雨無風 日忽暴熱必有颶風

颶風過 日落片片陰雲來日有風 日珥早

即雨 間狂風即起 日珥申後明日主雨 日暈午

前風起北方 日暈午後大雨即防 一日大風須防

日黃返照明日風狂 日沒暗紅無風必雨

日出卯遇雲無雨必天陰 日出光明無風

上弦月如懸弓必主多風 下弦月如仰瓦必

主多雨 月暈連宵必有大風 月光閃爍必



風角書  
主大風 月色生毛主風雨  
虹駕長空無雨 虹駕半空暴雨必至 虹見  
東方有風無雨 虹見西方風雨立至  
電見東方無雨 電見西方風雨  
雲垂春野雨 雲巧夏峯晴 雲薄秋山陰  
雲暗冬地雪 雲霧罩山春月必雨夏月必晴  
秋月必有風冬月必有雪 烏雲接日必雨  
片雲忽蔽青天即時風雨 雲垂四野不接山  
無雨 久雨雲不收不晴 雲收月出忽暗必

雨 雲從龍門起颶風連急雨 雲勢若魚鱗  
來潮風不輕 雲亂天頂絞風雨必不少 雲  
霞早赤午後風雨

風旺四時

春旺東風 夏旺南風 秋旺西風 冬旺北  
風

亢尾箕危昂井翼七宿臨朔日此月必多風雨  
執破值節令必有風雨

正月初三十七有觀燈送溯風



二月初九有接客風有幾番花信風

三月三日有大風有清明風

四月八日有浴佛風十八日有帶潮風

五月端午前後有剗船風尤前後有分龍風

六月十一二日有彭祖連天忌風

九月三日九日十三日二十三日有大風諺

云有前三三與後三三過此之後遠地多寒北風當令雨雪頻仍海道難行不必詳註

凡茲海運起于三月朔止于九月望得天時氣候之正加一小心方保無虞也

海運水經

朝看東南黑 勢急午前雨 暮看西北黑

半夜看風雨有占天頂早無雲 日出將漸明

西北暮無雲 明日更清明 遊絲天外飛

久晴更可期 清朝起海雲 風雨霎時辰

風靜鬱蒸熱 雲雷必振烈 東風雲過西

雨下不移時 東風卯沒雲 雨下巳時辰

雲起南山暗 風雨辰時見 日出卯遇雲

無雨必天陰 雲逐風雨疾 風雨霎時息



風角書 卷八  
迎雨對風行 風雨轉時辰 日沒黑雲接  
風雨不可說 雲右滿山低 連宵雨亂飛  
雲從龍門起 颶風連急雨 西北黑風生  
雷雨必聲訇 雲勢若魚鱗 來朝雨不輕  
雲鉤午前排 風雨屬人情 夏雲鉤內出  
秋風鉤背來 曉雲冬不慮 夜雨愁過西  
兩陣雨雙煎 大颶連天惡 惡雲半開閉  
大颶送風至 風息時靜默 亂雲天頂絞  
風雨來不少 風逐雨傾盆 雲過都晴了

紅雲日出生 勸君莫出行 紅雲日沒起  
晴明不可許 右占雲 秋冬東南風  
雨下不相逢 春夏西北風 下來雨不從  
汛頭風不長 汛後風雨毒 春夏東南風  
不必問天公 秋冬西北風 天光晴可喜  
長夏風勢輕 舟船最可行 深秋風勢動  
風勢浪未靜 夏雨連夜傾 不晝便晴明  
雨過東風至 晚來越添巨 風雨潮相攻  
颶風難將避 初三須有颶 初四還可懼



望日二十三 颶風君可畏 七八必有八下字

汛頭有風至 春雪百二旬 有風君須記

二月雨多風 出門還可記 初八及十三

十九二十一 三月十八日 四月十八至

風雨帶大潮 傍船人難避 端午汛頭風

二九君還記 西北風大狂 回南必亂地

六月十一二 彭祖連天記 七月上旬來

爭秋莫開船 八月半旬時 隨潮不可移

右占風

六月十一二日彭祖忌連天之忌君須記 七

月上旬爭秋風穩泊河南莫開船 八月半旬

潮候時風雨隨潮不可移 烏雲接日

雨即傾滴 雲下日光 晴朗無防

早間日珥 狂風即起 申後日珥

明日有雨 一珥單日 兩珥雙起

午前日暈 風起北方 午後日暈

風勢須防 暈開門處 風色不狂

早白暮赤 飛沙走石 日沒暗紅



無雨必風	朝日烘天	晴風必揚
朝日燭地	細雨必至	暮光燭天
日色連陰	日光精彩	久晴可待
日光早出	晴明必久 <small>一作不久</small>	返照黃光
明日風狂	午後雲遮	夜雨霧霏
右占日	虹下雨垂	晴明可期
斷虹免見	不明天變	斷虹早掛
有風不怕	右占虹	曉霧即收
晴天可求	霧收不起	細雨不止

三日霧濛	必起狂風	白虹下降
惡霧必散	右占霧	電光西南
明日交交	電光西北	雨下連宿
長矚電光	大颶可期	早來無慮
遲則有危	電光亂明	無風雨晴
閃爍星光	星下風狂	夏風電下來
秋風對電起	右占電	螻蛄放洋
大風難當	兩日不至	三日無妨
滿海荒浪	雨驟風狂	大海無慮



至近無妨	金銀徧海	風雨立待
海泛沙塵	大風難禁	若近山岸
子細思尋	烏鱗弄波	風雨必起
二日不來	三日難抵	水上鵝毛
風大難拋	東風可守	回南暫遛
白蝦弄波	風起便和	右占海
月上潮長	月沒潮漲	大汛潮光
小汛月上	水漲東北	東南旋漫
西南水回	便是水落	北海之潮

經日滔滔	高麗潮來	一日一遭
萊州洋水	南北長落	北來是長
南退方覺	揚子江內	糧舟之患
最怕船密	大風緊急	繫定且守
船走難纜	紐定必凶	直至沙岸
走花落砣	神鬼驚散	要知砣地
大洪泥硬	灘山一船	鐵砣可障
海中泥溜	順拋木砣	黑水洋深
接繳數尋	成山開處	鳴鑼鼓地



磨斷棕毛 篋繳可拋 成山鐵山  
萬丈深泉

武備志所載各月風候附

正月初三頭颶初七八颶十二三颶十七八燒  
燈風二十二三風二十七八風無雨風輕立  
春過後未驚蟄先動雷一月天門不開日夜  
海上有風浪驚蟄過後雷動不妨春雷起風  
雷春颶雷先行

二月初二三風初七八風十二三風十七八風

二十二三風二十七八風春有雷電海上有  
風浪本月初二霧露生日本日若重一年俱  
重如輕則輕

三月初三除颶風清明日主有大風本月二十  
一日立夏如發北風淮有二十日北風如南  
風天定也此句說未足

四月夏雷壓三風前立春日過後下雪一百二  
十日雪子風正月初八日下雨風輕晴明風  
重



五月初八日夏至發北風重梅雨本日晴明俱  
是南風黃魚從南來北風吹散魚頭羊日無

魚此段有  
錯落

六月十二彭祖忌有大風前三後四初十起十  
五止此幾日內發風俱作風忌六月有日七  
月有半六月十二無風七月十五亦無風六

有日句  
不可解

七月立秋日起五十二以下句缺  
少年半行起歷天定立  
秋掛蠶三日過有大風七日過有風則輕無

掛蠶過無風

八月起後早西風晚東風天定了本月二十七

日主有大風

九月初九日定颶風當日發風准定本日不發

不一二日必發十二三風十七八風二十二

三風二十七八風

十月初二三風初七八風十二三風十七八風

十四五有大風

十一月初二三風初七八風十二三風十七八







風角書

卷八

三

風角書卷八終



